



Prome Minister Mike Eman a elogia trayectoria di Su Excelencia Gobernador Fredis Refunjol

"Aruba lo keda pa semper cu gratitud p'e servicio pa nos pais"

DIABIERNA mainta Bestuurskantoor a bisti di fiesta pa celebra e hubileo di 30 aña di Status Aparte y 40 aña di Himno y Bandera.

E ceremonia protocolario tradicional y desfile nacional cu a sigui a keda presencia pa un grupo grandi di ciudadano y bishitantenan.

Tambe henter Aruba por a sigui esaki riba transmision en bibo di Tele Aruba. Durante e ceremonia Minister Mike Eman, a hiba un tremendo discurso como Prome Minister di pais Aruba.

E ceremonia protocolario pa un hubileo di e importancia aki naturalmente ta reuni mandatarionan di paisnan bisiña

y amigo den nos region.

Diabierna mainta Aruba a keda honra cu presencia di Su Excelencia Gobernador di St. Maarten sr. Eugene Holiday y señora y Su Excelencia Gobernador di Corsou, sra. Lucille George-Wout y esposo.

Discurso di Premier Eman a inicia dunando atencion special na Su Excelencia Gobernador di Aruba, Fredis Refunjol como cu esaki ta su ultimo biaha n'e ceremonia, den e funcion aki.

Minister President a relata con el a wordo yama na oficina di ex-Prome Minister Nel Oduber pa, como lider di oposicion, duna su apoyo n'e nominacion di





Refunjol. Tabata pa prome biaha den historia cu un candidato for di sector politico tabata wordo nomina. Prome Minister a considera cu sr. Refunjol a sirbi cu orguyo y dignidad pueblo di Aruba como miembro di Parlamento y tambe den Gobierno como Minister.

“No tin nada den su trayectoria, ni politico, ni personal cu por a pone mi duda den e capacidad, integridad y pasion di e personalidad di Fredis Refunjol,” asina Premier Eman a comenta. E mandatario a relata den su discurso cu pesey mes, ora el a bira Prome Minister di Aruba, el a prolonga su posicion como Gobernador tambe. “Masha danki pa bo servicio y sigur Aruba lo keda pa semper cu gratitud p’e servicio aki pa

nos pais,” Premier Eman a finalisa bisando y pidiendo un aplauso fuerte pa su persona.

Un bes cu a cumpli cu protocol pa cu yegada di mandatarionan, e presentacionnan a cuminsa. Ademá di discurso di Minister di Cultura Otmar Oduber y Prome Minister Mike Eman, ex-Vice Prome Minister Brinkhorst di Hulanda tambe a hiba palabra caminda a elogia y felicita nos pais. E parti artistico di e mainta a deleita un y tur pa su nificacion y bunitesa. Ademá di canto di Coro 1976 dirigi pa sra. Maybeline Arends-Croes y compaña pa musica di Orkesta Sinfonico dirigi pa sr. Jesus ‘Joy’ Kock, e ceremonia a clausura cu un produccion estupendo den man di bailarinan hoben dirigi pa sr. Freddy Tromp.

